

JOHANNIS ERICI
AD
VIRUM
SUMME VENERABLEM ET ERUDITISSIMUM
FINNUM JOHANNÆUM
S. Th. Doct. & Dioces. Skalholt. in Islandia Episcopum
EPISTOLA
DE
CHRONOLOGIA GUNNLAUGS-SAGÆ

ad
Hist. Eccles. Island. Tom. IV. p. 358—68.
&
Vitam Gunnlaugi Ormstungæ not. 82. 101. & 111.

Accesserunt
GUNNARI PAULI F.
Præpositi Dalensis & Pastoris Hiardarholtenfis.
CURÆ POSTERIORES
IN
GUNNLAUGI VITAM
& maxime
IN
QUÆDAM CARMINA ANTIQUA
in eadem obvia.

HAFNIÆ, 1778.
Sumptibus GYLDENDALII.

*Dono Scill. Dn. Arictoris nactus sum aivren opusculum
G.P.*



Q uamvis perquam erudita, & incomparabili, quæ in Te, *Vir Summe Venerabilis!* est, veteris nostræ chronologiæ & antiquitatum scientia omnino digna sint, quæ in *Appendice I.* ad absolutissimum *Historiæ Ecclesiasticæ Islandicæ* opus (a) in medium protulisti, contra *vulgarem*, ut vocas, *Epocham Plebisciti*, seu verius *legis*, quæ duella judiciaria apud Islandos abrogata sunt, eoqve ipso contra universam chronologiam *Torfaeo-Magnæanam*, quam in annis rerum, quæ *Gunnlaugi Ormstunge* seu *Vermilinguis Vita* vel ab ipso gestas esse, vel ejus tempore accidisse, tradit, computandis & dirigendis secutus sum. Non tamen prorsus abs re esse duxi paucula, adhuc hanc in rem submonere, nullo sane contendendi studio, nec ulla gloriolæ ex hac palæstra captandæ libidine, sed ea solum de causa, quod obscuris hisce & haud parum perplexis de veteri chonotaxi disceptationibus aliquid saltem lucis affundi posse sperarem, si rationes, quibus vel singula, vel certe præcipua chronologiæ, quam in *Gunnlaugi Vermilinguis vita* probavi, capita vere nituntur, sed quarum plurimæ, brevitatis studio, a me in ipso opere omisæ, paucissimæ contra indicatæ sunt, exoptata adeo occasione oblata, ulterius paulo declararem. Accedit quod mihi visus sim animadvertisse, hanc meam culpam in causa fuisse, quod etiam in eruditissimam hanc tuam commentationem nonnulla irreperint, secus forte locum in ea non inventura; unde jure metui, eam facile aliis, rerum minus peritis, vel errandi, vel meam sententiam aliter, atqve revera est, accipiendi & interpretandi ansam præbere posse.

In limine notare juvat, me certe non capere, cur epocham legis de duellis abrogatis, quam admisi, *vulgarem* appellas, partim, cum neminem omnino, præter *Torfeum* & *Magnæum*, in chronologia vitæ Gunnlaugianæ ordinanda præeuntem habuerim, partim, & maxime quidem, cum ex mea de his annotatione (b) satis appareat, me illam

A 2

epocham

(a) Tom. IV. p. 358. seqq.

(b) Vid. *Gunnl. Vitam*, p. 158—159.

epocham ne ex eorum quidem auctoritate adoptavisse, sed multo magis, calculis ultro citroque ductis, ex universa hujus chronologiæ compage, cum relationibus aliorum historicorum, quam potui diligentissime, collata, eruisse & constituisse. Sed jam ad rem ipsam.

Quod Gunnlaugus, ut *Tu* (c) ponis, natus sit 985, mera conjectura est, eo solum nixa, quod tum nasci potuerit, cum pater ejus Illugius Niger jam tum anno 981 matrimonium contraxerit. Nec me hoc latuit. Illugium enim ante annum 982. uxorem duxisse, etiam professus sum (d). Sed Gunnlaugi nativitatem ideo tam alte attollere integrum non judicavi; primò, quia omnia suadebant, eum, ut Her-mundo fratre aperte juniorem (e), ita unum ex liberis Illugii natu minimis fuisse; secundò, & præcipue quidem, quia talem nativitatis ejus epocham cum notis temporum ætatisque Gunnlaugi, quas *ipsa* ejus *Vita* Cap. V. & VI. conceptis verbis inculcat, quibusque totam suam chronotaxin manifeste superstit, nullo modo consistere posse deprehendi. Si enim Gunnlaugus, ut hæc (f) sine omni ambiguitate tradit, & mox pluribus declarabo, tribus post legiferi officium à Skaptio susceptum annis, seu 1006, XVIII. annorum fuit, perspicuum visum est, eum ex ejus mente ante annum 988. natum statui non posse, nisi vis aperta ei inferretur.

Eis, quæ Gunnlaugum ab anno 1000 ad 1003. egisse statuis, (g) ut immoremur, opus non est, cum ea omnia ex anno natali, qui ei tribuitur, unice pendeant, & prout hic, vel ex *Tua* sententia attollitur, vel ex mea deprimitur, diverse cadant.

Progredior igitur ad ea, quæ *Gunnlaugi Vita* Cap. V. narrat, & in his speciatim, quod Helga ei certa conditione promissa fuerit, isque eo facto ad externos abierit. Hæc (h) ad annum 1003 ideo refert, quia *Skaptius* dicitur legifer fuisse cum agerentur. Id vero, ut facerem, nexus & ordo, quem autor hic noster in scribendo observavit, prohibere videbantur. Ut enim primis operis sui capitibus, quæ maxima

ex

(c) Hist. Eccl. Tom. IV. p. 358. not. a.

(d) Ad Gunnl. Vit. Not. 52. p. 74—75.

(e) Ibid. Not. 37. p. 44. 45.

(f) P. 64. & 84.

(g) Hist. Eccl. l. cit. p. 358—59.

(h) L. cit. T. IV, p. 359. not. a.

ex parte præliminaria sunt, duarum personarum hujus historiæ principalium genus, nativitatem, educationem, corporis animique dotes, &c., & Helgæ quidem *Capp.* I. II. & III, Gunnlaugi vero Capite IV. descripsit, ipsamque historiam ab hospitio Gunnlaugi apud Thorsteinem Egilli, quippe quod primam ejus in Helgam amoris originem dedit, enarrando exorsus est; ita Cap. V, postquam tertiæ personæ principalis, Rafnis scilicet, genus & ingenium delineavit, inceptum historiæ filum ulterius perducit, illud inprimis factum, quod ex priore proximum emerfit, sequentibus vero cum Hrafne simultatibus occasionem subministravit, nempe Gunnlaugi cum Helga sponsalia, licet conditionalia, cum omnibus circumstantiis plene admodum describendo. Hic autem primo (*i*) distincte notat, Gunnlaugum primo, postquam à patre aufugit, anno Borgæ mansisse; deinde (*k*) expresse monet, Skaptium legiferi officium tum adiisse, quod anno 1003. factum esse consentimus; & postea primum, nonnullis interjectis, addit (*l*) Gunnlaugum tres annos Gilsbackæ cum patre & Borgæ cum Thorsteinem alternis vicibus egisse, horumque ultimo (*m*), promisso de Helga accepto, peregre abiisse. Hinc prono alveo fluere censui, eam auctori mentem esse non potuisse, ut Gunnlaugi sponsalia & abitus, ad eundem annum, quo Skaptius legiferi officium suscepit, scilicet 1003, referrentur, sed multo magis, ut hic ipse annus, eum, quo Gunnlaugus Borgæ primum hospitabatur, designaret, atque ideo, ut tres reliqui anni, quos Borgæ & Gilsbackæ alterne egit, ei adderentur; quibus observatis, Gunnlaugi sponsalia & abitus, non in annum 1003, sed in annum 1006 incidunt.

Rationes generales, quæ me ad hoc induxerunt, notas nempe chronologicas, ab autore ipso disertis verbis positas, earumque ordinem, jam indicavi. Specialiorem universus narrationis, quæ huic historiæ propria est, contextus suppeditat, quatenus ex eo manifestum est, Gunnlaugi apud Thorsteinem hospitium & conversationem cum filia ejus Helga (*n*) illud esse temporis punctum, à quo autor hujus suæ narrationis initium computat; quibus ubi Cap. V. subjunxit, Skaptium

A 3

legiferi

(*i*) Vide Gunnl. Vit. Cap. IV. pag. 48—49.

(*k*) Ibid. Cap. V. p. 62. 63.

(*m*) Ibid. p. 80—81.

(*l*) Ibid. p. 64—65.

(*n*) Ibid. Cap. IV.

legiferi officio tum admotum fuisse, hujus hospitii & conversationis terminum, ut ajunt, à quo, æstatem nempe, qua Skaptius legifer factus est, (æstivo enim tempore Gunnlaugum à patre aufugisse (o) satis apparet) constituere, atqve ita narrationem capitis IVti cum capite Vto connectere sine omni dubio voluit. Alternam vero Gunnlaugi Gilsbackæ & Borgæ per tres annos mansionem, eum ex suo sensu ad hunc temporis articulum retrahere non potuisse, sed separatim numerasse, inde facile patere ratus sum, quod antea (p) retulisset, Gunnlaugum primum annum Borgæ permansisse. Unde concludi debere videbatur, eum ad patrem non rediisse, anteqvam hic, audito, quod omnium favorem sibi ibi conciliasset (q), spem de ejus moribus in melius mutandis conceperat, eaque delinitus eum in gratiam receperat. Quæ de religione christiana in Islandiam introducta Cap. V. (r) interferuntur, ipse l. cit. satis declaravi ad annum 1003. referenda non esse; omisi vero addere, quod tamen, ad omnem ambiguitatem hac in re vitandam, oppido necessarium erat, ipsum orationis hoc loco nexum, quatenus per ea aperte abrumpitur, argumento esse, quod ad originariam autoris scriptionem non pertineant, sed, quemadmodum plura alibi, à veteri aliquo librario (nam etiam in antiquis exemplaribus exstant) adjecta sint, ut ista circa prima religionis christianæ in Islandia initia accidisse monstraret; unde vel tres prædictos annos ab his computare, vel reliquæ autoris chronologiæ statuminandæ fundamenta petere, tanto minus consultum visum est, cum ipse, ut supra indicavi, alia, & quidem contraria, substraverit. Accedit quod difficultas, quam ex statione Audunis Festargarmi in portu occidentalis Islandiæ Biarnarhöfn nasci necesse est, si Gunnlaugi cum eo abitus ad annum 1003. referatur, penitus evanescat, si annus 1006. ex nostro calculo substituitur. Hanc autem, licet ingeniose admodum & docte à Te (s) extricata sit, prorsus declinare satius est, cum altera, circa annum, quo Audunus naufragio periit, ex mea sententia (t) facile solubilis, tum sola superfit. Et hæc de fundamentis, quibus Vitæ Gunnlaugianæ chronologia, à me admittā, sustinetur, universe monuisse sufficiat.

Quæ

(o) Conf. ibid. Cap. IV. pag. 46—49.

(q) Ibid. p. 52—53.

(s) T. IV. p. 359. not. b.

(p) Ibid. p. 48—49.

(r) P. 64—65.

(t) Ad Gunnl. Vit. p. 68—69.

Quæ ad ultimam *Gunnlaugi in Anglia mansionem* pertinent à *Te* Vir celeb. (u) ad annos 1005. 1006 & 1007, à me vero ad annos 1008, 1009 & 1010. relata, conjunctim sumo, ea observatione præliminari adjecta: hanc trium annorum differentiam inde unice pendere, quod rerum à Gunnlaugo gestarum chronologia, ut supra indicavi, à *Te* ab epocha religionis christianæ in Islandiam introductæ, s. ab anno 1000, à me vero à magistratu Skaptii, s. anno 1003, computata sit. Tantum autem abest meam hanc chronotaxin, vel hujus mansionis annis, vel *Gunnlaugi Vita* de ea relationi superstructam esse (x), ut illi potius ex prædictis, quæ præstruxi, computandi fundamentis sponte emerferint, ubi acta, quæ *Gunnlaugs-Saga* cuilibet vitæ ejus anno assignat, ad annos æræ christianæ retuli. Cum vero dubitari nequeat, quin *Gunnlaugs-Saga* autor, ut plurimi Islandorum, Sveinis Daniæ Regis mortem ad annum Christi 1009. referre voluerit, nova etiam ratione elucet, eum suam computationem à Skaptii magistratu instituisse, cum primus mansionis Gunnlaugi in Anglia annus in eundem hunc annum 1009. incidat, ubi ab hoc magistratu calculus ducitur. Sed quod is, ejusque Scholias, ut alii Islandorum, in anno Sveinis emortuali erraverint, atque ideo filio Canuto quædam tribuerint, quæ illi vere tribuenda erant, æque ac *Tu* (y) dilucide, ut opinor declaravi. (z)

Cetera facile largior satis causæ Ethelredo anno 1006 esse potuisse, cur sibi à Danis metueret, & Gunnlaugo ideo, si tum in Anglia fuisset, commeatum in Islandiam denegaret (a), cum *Job. Bromtonus*, *Ran. Higdenus*, *Rogerus de Hoveden* & plures Anglorum doceant Sveinem Regem, qui anno 1004 vel 1005 Angliam reliquerat, expectari tum potuisse cum novis copiis eo brevi rediturum. Quod vero Ethelredus (b), etiam post Sveinis mortem, satis causæ habuerit, cur sibi & suis non minus à Canuto, quam olim ab illo, timeret, facile apparet. Ignorare enim nequaquam potuit, quod Canutus 1., nec ætatis adeo immaturæ, nec rei militaris adeo inexpertus esset, ac hypothesis Islandica svadet; quodque 2) expeditionem in Angliam moli-

(u) H. E. T. IV. p. 359. not. c. p. 360. not. a. b.

(x) Quod l. cit. p. 360. not. a. sentis.

(y) L. cit. p. 360. not. a.

(a) H. E. T. IV. p. 359. not. c.

(z) Ad *Gunnl. Vitam* not. 82. pag. 120—21.

(b) De quo loc. cit. p. 360. not. a. dubitas.

retur, non universo tantum Daniae robore stipatus, sed Svecicis etiam Norvegicisque auxiliis firmatus. Hunc autem metum, ex Canuti expeditione conceptum, qui ad annum 1014 re vera pertinet, *Gunnlaugs-Sagæ* autorem ad annum 1009 perperam retraxisse, data opera annotavi (c); jamque, *Tē* (d) præeunte, addo, eum etiam errasse, dum commeatum ex Anglia Gunnlaugo anno 1009 ideo denegatum esse refert. Contra objectio (e), quod Ethelredus vere anni 1009 ideo causari non potuerit, Canutum venturum esse, cum pater ejus Sveinn Rex secundum *Olai Crassi Vitam* usque in autumnum ejusdem anni vixerit, solam *Olai Vitam* ferit, quatenus Sveinis mortem, loco Februarii, in autumnum perperam retulit, non vero *Gunnlaugs-Sagæ* autorem, qui tempus anni, quo Sveinn mortuus est, non memoravit, imo verum forte scivit, quamvis annum ipsum vitiose posuerit; talia enim veteribus haud raro usu veniunt. Nec magis chronologiam auctoris *Gunnlaugs-Sagæ* infringere valent *Knytlinga-Sagæ* & *Olafs-Sagæ* calculi, ex quibus Ethelredus annos 1008 & 1009 exul in Flandria egit, cum ex *Simone Dunelmensi*, *Radulfo de Diceto*, *Ranulfo Higdeno*, *Henr. Huntindoniensi*, *Rogero de Hoveden* & pluribus Anglorum historicis manifestum sit, eum his duobus annis, ut & anno 1010 adhuc in Anglia fuisse, quem etiam admodum *Henricus de Knyghton*, *Joh. Wallingford*, *Huntindoniensis*, *Hovedenus* & alii docent, eum in Flandriam, vel verius Normanniam, non profugisse, priusquam anno 1013, cum Danorum in Anglia potentia adeo invaluerat, ut sibi non videret in hoc regno amplius tutum esse. Unde facile apparet, *Gunnlaugs-Sagæ*, & speciatim mansionis Gunnlaugi in Anglia chronotaxin, universim spectatam, & cum Ethelredi actis collatam, *Olafs-Sagæ* & *Knytlinga-Sagæ* calculis veriorē esse, præsidiumque prorsus invictum in historia Anglica vere invenire. Neque hoc solum. Verum *Johannes Bromtonus*, *Henr. Huntindoniensis*, *Ran. Higdenus*, *Simeon Dunelmensis*, & *Rogerus de Hoveden* non tantum consentiunt, bellum in Anglia à Danis anno 1009 magna contentione redintegratum, & anno 1010 continuatum esse, sed *Higdenus*, *Dunelmensis*, & *Hovedenus* præterea nominatim memorant Thorkillum Ducem anno 1009 cum exercitu

(c) Ad *Gunnl. Vitam* p. 121.

(d) T. IV. p. 360. not. a.

(e) Ibid.

citu in Angliam venisse, duoque ultimi insuper addunt, Danicos Duces Henningum & Eilafum cum pluribus copiis mense Augusto ejusdem anni mox accessisse. Cumque Ethelredus his ipsis annis, dum Gunnlaugum secum habuit, contra Danos movisse videatur, veri omnino simile est, hunc, utpote aulicum & satellitem, ejus signa secutum esse, quamvis ejus *Vitæ* autor, rerum Anglicarum minus, quam par erat, gnarus, id non memoraverit. Planum vero, Ethelredum ætate anni 1009 vere dicere potuisse, gravissimi belli metum Angliæ tunc imminere, atque ideo Gunnlaugo comitatum denegasse, cum Thorkillus, novis copiis Danicis stipatus, jam tum venisset, Hemingus vero & Eilafus exspectarentur; idque Scholiastes auctoris observatione de Hemingo adjecta sine dubio indicare voluit. Hunc igitur metum ut veram comitatus denegati causam *Tecum* (f) quidem lubens amplector. Verum cum hic, secundum scriptorum Anglicorum computum, non ad annum 1007, sed ad 1009 pertineat, chronologia auctoris etiam hac in parte consensu eorum firmiter sustinetur; ita ut nihil in ea reliquum sit, quod jure ut falsum agnosci possit, nisi quod Sveinns Regis mortem ad annum 1009 retulit, metumque à Canuto pro causa comitatus Gunnlaugo denegati venditat, quorum tamen utrumque, ut supra monui, chronologiæ compagem ne minimum quidem turbat, sed ea prorsus salva rejici potest.

Ita ad *conflictum Gunnlaugi cum Rafne* in comitiis Islandiæ universalibus, &c, quod caput rei est, ad *epocham legis de duellis judiciariis abrogandis* pervenimus. Hæc ex *Tua* computatione (g) ad annum christi 1008, ex mea vero (h) ad annum 1011 pertinent. Quod autem ad argumenta attinet, quibus utraque hæc computatio nititur, monere sat esto:

1) Me prædicta comitia ideo cum comitiis post Niali incendium proximis minime confundere, cum hæc ad annum 1012 retulerim, atque ita illis, ut *Gunnlaugs-Saga* postulat, postposuerim.

2) Quod frequentiæ comitorum Gunnlaugo-Rafnianorum causa in eorum historia & gestis quærenda non sit, *Tecum* (i) facile agnosco; nec nego comitia anni 1008 reliquis frequentiora esse potuisse,

(f) Ibid.

(h) Ad *Gunnl. Vit.* p. 150—159.

(g) H. E. T. IV. p. 361. & not. a.

(i) Loc. cit.

ob factiones optimatum ex cæde Viga-Styris natas. Hæc vero frequentia argumento esse nequaquam potest hæc comitia eadem fuisse, in quibus Gunnlaugus cum Rafne conflixit, & lex de duellis judiciariis abrogandis lata est. Nec Comitibus anni 1011, ad quem utrumque refero, similis vel etiam majoris frequentia ratio defuit, cum in eis de viri nobilissimi & omnibus acceptissimi, Hoskuldi nempe Hvitanefensium Pontificis, cæde ageretur. In hac enim causa ex uno latere Flosius & Sigfusidæ, ex altero vero Niall cum filiis, potentissimum quemvis optimatum suas in partes traxerunt; & illi quidem Hallum de Sida, Skaptium Thoroddi legiferum, & plures; hi vero, Asgrimum Ellidagrimi, Gisserum Album, Hialtium Skeggii, Gudmundum Opulentum & Einarum fratres, nec non Snorrium Pontificem, quos omnes & plures adhuc *Nials-Saga* (k) operose enarrat in his comitiis adfuisse magna manu stipatos.

3) Qvod *Eyrbyggja-Saga* Gunnlaugum quendam Ormstungam inter eos optimates numeret, qui Snorrium Pontificem anno, ex *Tuo* calculo, 1008 à transitu Albis Borgfiördensis prohibuerunt, me minime latuit, cum eandem historiam (l) ipse retulerim. Ideo vero induci non potui, ut nostrum intelligerem. Hunc enim, utpote juvenem, in familia paterna, adeoque sub potestate patria adhuc constitutum, & nondum sui juris factum, inter principes territorii, ætate pariter ac auctoritate pollentes, collocari, patre præsertim vivo ac præsentem, incongruum, & à moribus veterum alienum, atque ideo scriptore satis accurato, qualis *Eyrbyggja-Saga* autor est, indignum, visum est. Hinc oportere censui alium quendam intelligi, eodem cum Gunnlaugo nostro, ut olim sæpius usu venit, nomine & cognomine gaudentem; isque se ultro obtulit, Gunnlaugus nempe Ormstunga, avus Illugii maternus, nostri vero Gunnlaugi proavus. Nec temporum ratio obstitit. Si enim computemus Gunnlaugum hunc seniore anno 920 natum esse, & 20 annorum fuisse, cum filia ejus Thorida Dylla nata est, 40 vero cum ea Illugium Nigrum peperit, tandemque 60, cum Illugius matrimonium contraxit, (quæ temporum intervalla plus satis sufficiunt), anno 1008 annum ætatis 88 supergressus non erat; quæ ætate eum valetudine & viribus tam firmis esse potuisse,

(k) Cap. 113—124. p. 172—191.

(l) Ad Gunnl. Vit. not. 8. p. 9.

potuisse, ut exercitui non ita longe a villa sua (Gunnlaugsstadis enim ad meridiem Thveræ, secundum *Libr. Origg. Islandiæ* (m) habitavit) collecto, si non confligendi, attamen consulendi causa, interesse potuerit, similia perimulorum, non antiqui solum, sed recentioris etiam, & in his nonnullorum nostri ævi grandævorum exempla facile svident. Ulterius adhuc idem confirmant synchronismi in *Libro Origg. Islandiæ* (n) indicati, & à me ex parte ad calcem *Gunnlaugs-Sagæ* (o) in Tabulam genealogicam redacti. Ex his enim Gunnlaugus hicce Ormstunga senior, secundum generationum numerum ab Illugio Negro sursum computatum, Hroskeli synchronus evadit. Hroskell, secundum *librum Originum* (p), Arinbiörni Duci juniore, Thorero filio, coævus erat, utpote ex matertera Arinbiörn's natus. Atqvi Egilli Skallagrimi filio, eidem Arinbiörni etiam coævo, qvi diu ante annum 920 natus, ad finem fere seculi ætatem produxit, eas ad extremum usqve vitæ fuisse corporis vires, ut militiæ & armis, si oculi non caligassent, vacare posset, *Egils-Saga* edocet. Unde certe nihil absurdi vel inauditi emerfurum prævidere potui, si idem de prædicto Gunnlaugo admitteretur. His argumentis ductus ab initio dubitavi, & adhuc vehementer dubito, confidenter pronunciari posse, Gunnlaugum nostrum juniorem Illugii filium anno Christi 1008 non in Svecia, nec in Anglia, sed in Islandia fuisse. Primo enim prædictum *Eyrbyggja-Sagæ* testimonium vel ideo hac in re omni exceptione majus habendum non videtur, cum tam de proavo ejus, ut nuper indicavi, quam de alio quodam ejusdem nominis & cognominis, licet aliis nostratium historiis ignoto, intelligi possit. Deinde nequaquam probabile est, autorem *Vitæ Gunnlaugi nostri* ignorare id potuisse, si hic controversiæ adeo celebris & vulgo olim notæ, qualis illa de cæde *Viga-Styris* erat, partem fecisset, cum res etiam minimas, certe hac controversia longe minores, quæ ad eum pertinent, tam diligenter conquisiverit. Unde ejus de re adeo memorabili silentium haud exigui ponderis esse visum est, & adhuc videtur.

Quod verius putas (q) *duella judiciaria successive, quam semel & simul* abrogata esse, haud parum miror. *Gunnlaugs-Sagæ* enim hac

B 2

de

(m) Ed. Havn. p. 56.

(n) Ed. Havn. p. 53.

(o) P. 313.

(p) Loc. cit.

(q) H. E. T. IV. p. 362—63.

de re narratio non tantum *Vallnaliots-Sagæ*, quæ hanc abrogationem simul & semel factam esse innuit, consensu satis firmatur, sed etiam per singula, quæ in historia Islandiæ occurrunt, duellorum hujus generis exempla eundo, atque ita per inductionem, ut ajunt, plene itabitur. Quæ horum *Kormaks-Saga* & *Hallfredar-Saga* (r) memorant, in confesso est duello Gunnlaugi cum Rafne antiquiora esse, cum illarum hac de re narrationes ad hujus tempora, seu ad annum 1011, non descendant. *Níðls-Saga* vero eo majus hac in re momentum vere trahit, cum ante hunc annum crebra satis in ea sit duellorum judiciariorum mentio, postea contra nulla. Accedunt aliæ rerum prioris seculi XI parte, post prædictum Gunnlaugi duellum, in Islandia gestarum historiæ, quarum bene multas habemus, in quibus altissimum est de his duellis silentium, quod vix evenire potuisset, si hæc ibi tum temporis adhuc in usu fuissent. Et quod ad *Liðsvetninga-Sagam* attinet, quæ sola inter omnes talium hoc tempore duellorum mentionem injicit, singula ejus hac de re testimonia, in notis ad prædictum *Gunnlaugs-Sagæ* locum (s), ita mihi excussisse videor, ut nullus dubitem, argumenta, quæ inde contra meam sententiam desumuntur, ex ipsa circumstantiarum, quas continent, ratione, si modo hæc rite explicetur, satis dilui posse. Imo, tantum abest prædictam *Liðsvetninga-Sagam* huic sententiæ adversari, ut eam ipsam potius quam maxime confirmet, conceptis verbis & data opera declarando, tam utrumque illud duellum, quod, post istud Gunnlaugi cum Rafne, oblatum esse memorat, omni juris specie destitutum, quam universim, duella judicaria tunc temporis apud Islandos non solum legibus abrogata fuisse, sed etiam ab usu fori penitus recessisse. Non ergo *pro certo* haberi debere videtur, talia duella, post istud Gunnlaugi cum Rafne, in ipso dicasterio generali *sæpius* & oblata & acceptata fuisse, cum non nisi unicum talis rei exemplum, (nempe Thorceris Helgii filii & Gudmundi opulenti in *Liðsvetninga-Saga* (t)), proftet, & quidem ejusmodi, quod omnes cordati legibus adversum statim pronunciarunt, quodque ideo etiam omni effectu caruit. Nec verisimile est, duellorum judiciariorum cacoëthes animis veterum, etiam post christiana sacra intro-

(r) Vide Olafs-S. Trygg. S. ed. Skallholt P. II. p. 305—306.

(s) P. 156—158.

(t) Cap. XVII.

introducenda, adeo infixum fuisse, ut repetita hujus legis iteratione opus esset, partim cum notissimum sit, talia duella, ob multiplicem abusum, ethnicis jamtum haud parum exosa fuisse, partim, & maxime quidem, cum *Te* etiam (*u*) fatente, nullum id genus duelli apud Islandos commissi exemplum in universa seculi XI^{mi} historia, post istud Gunnlaugi cum Rafne, occurrat. Omnium tamen minime ex Hrolfi & Eyulfi Gudmundi filii exemplo, *Liósvetninga-Sagæ* (*x*) memorato, concludi potest, hujus moris reliquias usque ad Isleifi episcopi tempora perduravisse, cum duellum, de quo ibi sermo est, non ad duella juris civilis, de quibus hic agitur, sed ad modos bella componendi, qui juris gentium sunt, pertineat. Sed nolo in re clara, jamque ut spero satis exposita, diutius hærere. Tantummodo moneo, Grettis in ordalio subeundo facilitatem, quam loc. cit. (*y*) memoras, argumento vix esse posse, hunc probandi modum tunc temporis in Islandia notum fuisse. Quamvis enim athleta esset duri admodum & militaris ingenii, facile tamen, utpote vir cetera prudens, praevidere potuit, necesse sibi fore, ut in Norvegiam delatus, & criminis nefandi ibi accusatus, hujus probationis, ab Olao Rege in leges Norvegorum nuper relatæ, periculum subiret; inprimis cum obiectum crimen purgare impense averet, & inter ejus aulicos recipi ambiret; eum vero non mediocriter severum, & omnis contradictionis impatientem esse, ab indigenis sine dubio audiverat.

De eis, quæ porro circa epocham Comitiorum, quæ incendium *Níðliamum* proxime secuta sunt, mones (*z*), facile spero inter nos conveniet, ubi primo ipsam super his *Níðls-Sagæ* chronologiam, & deinde reformationem ejus vel emendationem, à *Te*, Vir S. V., tentatam, & denique argumenta, quæ huic occasionem dederunt, distincte examinaverimus.

Ad primum quod attinet, ipse (*a*) concedis, quindecim Flosii, incendii auctoris, socios, prælio Brianico in Hibernia interfuisse vere anni 1014; hoc autem *Níðls-Saga* (*b*) perspicue docet commissum fuisse proximo vere postquam Flosius cum eis Islandia profectus est; Unde hæc

B 3

Flosii

(*u*) H. E. T. IV. p. 362.

(*x*) Cap. XXIX.

(*y*) P. 363.

(*z*) H. E. T. IV. p. 363—64.

(*a*) L. c. p. 363.

(*b*) Edit. Havn. capp. 154 & 155. p. 267 & 268. cum cap. 158. p. 274. collatis.

Flosii profectio ad æstatem anni 1013 necessario referenda est. Jam *Níals-Saga* (c) ulterius monstrat, antumnum anni 1013, à Comitibus post incendium proximis, secundum fuisse, dum dilucide declarat (d), Flosium integrum annum post hæc Comitibus domi ex facto perman- sisse, ejusque anni hieme, vel, accuratius loquendo, initio anni 1013, Hallo de Sida conciliante, cum Thorgeire Skorargeire in gra- tiam rediisse. Hæc ergo Comitibus, ut in notis ad *Gunnlaugi vitam* (e) jam dudum computavi, (qvæ etiam omnia ipse concedis (f)), in æstatem anni 1012, ipsumque incendium in annum 1011, incidant necesse est, cum in confessa sit, ea non eodem, quo incendium perpetratum est, sed sequenti demum anno celebrata fuisse (g).

Talis *Níals-Sagæ* computus est. Qvod autem ad ejus refor- mationem vel emendationem a *Te Vir S. V.* propositum, qvod se- cundum erat, attinet, concedi quidem debet, qvod vulgaris chro- nologia, ut & *Annales*, & in his *Skalboltenfes vetustiores*, *Reseniiani*, *Holenses recentiores*, nec non *Regii* apud *Langebekium* (b) incendium *Níalianum* ad annum 1010, adeoque Comitibus post id proxima ad annum 1011, referre soleant (*Skalboltenfes* enim *recentiores* qui 1009, & *Flateyenses*, qui 1001 præferunt, in censum non veniunt). Sed eorum auctoritas nequaquam tanti est, ut *Níals-Sagæ* calculo derogare va- leat, quippe qvæ integram hujus incendii historiam data opera per- tractat, & cujuslibet anni acta accurate distinguit, cum contra *An- nales* levem tantum incendii mentionem faciant. Et si secundum istam vulgi & *Annalium* computationem unus annus initio exilii Flosii addatur, ejusque peregrinatio ad annum 1012 retrahatur, non solum gratis prorsus, & sine omni veterum auctoritate assu- mendum est, Flosium, postquam Islandiam reliquit, aut in Hialt- landia aut Færeysis, aut alibi terrarum, unam hiemem egisse, ante- quam ad Orcades delatus est, sed *Níals-Sagæ* etiam narrationi vis aperte

(c) Ibid. Cap. 147. p. 254. cum Cap. 154. p. 267. collato.

(d) Cap. 146. p. 251. collato cum Cap. 147 & 148. p. 254 & 256.

(e) P. 159.

(f) H. E. T. IV. p. 364.

(g) Confr. interim *Níals-Saga* Cap. 127. usque ad C. 135.

(b) Script. rer. Dan. Tom. III. p. 38.

aperte inferenda. Hæc enim dum conceptis verbis inculcat, tam (i) quod primam post sæpe dicta Comititia hiemem non extra, sed intra Islandiam manserit, quam (k) quod ejusdem anni autumnus, quo inde solvit, in Orcades venerit, talem ejus in Hialtlandia, Færeysis, aut alibi terrarum extra Islandiam hiemationem sine omni verborum anfractu negat. Unde prius hocce prædictæ emendationis instituendæ remedium, *Te* etiam (l) consentiente, sæcure rejici potest.

Posteriorius in eo situm est, quod *Njáls-Saga* (m) refert, Flofium æstate anni 1014 ex Hebudis, per Gallias, Romam tetendisse, indeque iterum, per superiora Italiæ, Germaniam, & Daniam tam cito rediisse, ut hiemem anni 1015 apud Ericum comitem in Norvegia agere, ejusdemque anni æstate Islandiam repetere posset. Tu autem (n) tam festinum iter locum hic non habere, sed unum annum ad finem exilii addi debere sentis, ita ut integrum annum, cum alterius parte vel dimidio, huic itineri insumeris; atque ita in Norvegiam priusquam sub autumnum anni 1015, tandemque in Islandiam, priusquam æstate anni 1016, non redierit.

Ad argumenta, quæ *Te* in hanc sententiam traxerunt, (quod tertium hujus nostræ disceptationis momentum est) & primo quidem: quod Flofius pedibus tantum hoc iter emensus sit: secundo, quod Romam rediens, variis in urbibus commoratus fuerit, virosque principes convenerit: & tertio denique: quod secus vere dici non possit, pactum de triennali exilio, à se initum, implevisse; varia reponi possunt, & speciatim.

1. Si vel maxime his *Njáls-Sagæ* verbis (o): Flofi hóf vpp Svdr-gavngy sína ok gekk fvdrr, i.e. *Flofius ambulationem suam australem incepit, & austrum versus ambulavit*: pressè adeo inhærere libeat, ut admittamus; eum pedibus tantum, per Gallias, Romam iter-

(i) Cap. 147. pag. 254.

(k) Cap. 154. pag. 267

(l) P. 364.

(m) Cap. 159. pag. 281.

(n) L. cit. p. 364.

(o) Loco a *Te* cit.

iter fecisse, etiamsi id omni dubio haudquaquam careat, non tamen ideo opus esse videtur, ut longum admodum tempus huic itineri tribuamus, cum iter pedestre Svinafellum inter & Vapnafiördum Islandiæ, in *Njáls-Saga* (p) descriptum, quod auxilia petiturus, media hieme exorsus est, & aliquot septimanis confecit, documento esse possit, eum pedibus plurimum valuisse.

2. Eodem jure, quo credi potest, eum Romam ambulasse, eodem etiam *Njáls-Sagæ* de reditu ejus verba (q): fór aptr: i. e. *reversus est*: quippe quæ profectionem quamlibet notant, ad amussim sequi, atque ideo admittere debemus, eum in reditu jam eqvis, jam vehiculis aliâve vectura usum esse; idque eo magis, quod omnis illa pedestris itineris necessitas, quam pœnitentiæ ratio ei forte ante imposuit, absolutione impetrata penitus cessaverat. Accedunt luculenta *Njáls-Sagæ* testimonia, tam (r) quod à Gillio Hebudarum Comitè magna argenti vi ad hoc iter instructus fuerit, quam (s) quod Romæ haud parum pecuniæ expenderit, ut absolutionem ab ipso Pontifice obtineret; quæ satis indicant, pecuniam, quâ ad vecturam conducendam opus erat, ei non defuisse.

3. Iter, quod Flosio hic ultro citroque faciendum erat, longius vere non fuit, quam ut etiam autumnò anni 1014, etsi adulto, in Norvegiam redire posset. Verum cum *Njáls-Saga* id diserte non memoret, sed tantum indefinite (t), quod *sequentem hiemem*, vel accuratius loquendo, *hujus hiemis partem* („um vetrinn eptir“) in Norvegia egerit, ipsa hæc narratio eo haud obscure inducit, ut statuamus, eum eo non venisse, priusquam aliquanto tempore post festum Jolense, vel initium anni 1015. Ita plus integro semestri ad iter lucratur; idque plus satis sufficere videtur, si mora, quam variis in urbibus necebat, ut sine dubio debet, eo modo intelligatur, quo multorum etiam hodie peregrinantium, qui res terrarum vel urbium præcipuarum, quas permeant, maxime memorabiles in transitu perlustrare, earumque princi-

(p) Cap. 135. p. 213—215.

(q) P. 281.

(r) Cap. 158. pag. 280.

(s) Cap. 159. pag. 281.

(t) P. 281.

principibus, benevolentiae & honoris captandi gratia, sistere se solent, quod itinera multum non retardat.

4. Dum, *Níalsfaga* praeeunte, Flosium aestate anni 1013. Islandia profectum esse, aestate vero vel autumno anni 1015. rediisse statuo, simul quidem mihi fatendum est, quod plenos tres annos non abfuerit. Cum autem nihilominus perspicuum sit, quod partem tam aetatis quam hiemis anni 1013., integram hiemem aequae ac aetatem anni 1014., & denique non hiemis tantum sed etiam aetatis anni 1015. maximam partem peregre egerit, more loquendi veteribus Islandis aequae ac reliquis septentrionalibus usitatissimo, (quippe qui in annis aetatis humanae, rerum gestarum, imperii principum, variisque negotiis forensibus computandis, terminos inceptos pro completis numerare vulgo solebant), recte dici potest, quod tres hiemes abfuerit. Et quamvis, ut nihil dissimulem, Codex Legum veteris Islandorum Reipublicae *Grágás* s. *jus Ulflotianum reformatum*, Tituli *de forma rei judiciariae*, vulgo *Pingskapa-Pátttr*, Cap. 34. sanxerit: *relegatum, si ante tres hiemes rediret, exilii pleni poenam subire*. („Ef hann kömr fyrr vt hígat enn hann hafi þreca vetr a brot verið. oc verþr hann scógarmaþr „); certum tamen haudquaquam est, annos completos hic intelligi. Contra vero, tam ex hoc ipso legum Islandicarum Codice, quam ex historicorum antiquorum testimoniis alibi (u) à me productis, certissimum, relegationis s. exilii limitati vel temporarii, quale istud Flosii fuit, apud Islandos modum, ubi transactione vel pacto constituebatur, maxima ex parte in arbitrio paciscentium positum semper fuisse. Nec pactum, ex quo Flosius Relegationem subiit, aliud svadere potest, utpote generaliter tantum *tres hiemes* (Þríá vetr) memorans (x). Cum vero Romam praeterea peteret, & absolutiorem ab ipso Pontifice impetraret, quod eum ipse *Níalsfaga* auctor, transactionem cum Thorgeire Skorargeire describens (y), non his pactis obstrictum, sed voto tantum spontaneo inductum fecisse, clarescit

(u) ad *Joh. Arnai* Indledning til den Islandske Rettegang not. 233. pag. 626-27.

(x) *Níalsf.* Cap. 146. pag. 251.

(y) Cap. 148. p. 256. cum p. 257. collat.

fatis indicat, jure scribere potuisse videtur (z) eum, cum domum rediret, *omnia sua pacta fideliter implevisse*, quamvis tres integros annos peregre non egisset. Ignorare enim minime potuit, itineris Romani & abolitionis pontificalis religionem, ex seculi XI^{mi} institutis, facile supplere potuisse, quod tempori forte defuit.

Ita ne posteriore quidem computationis *Níalsfagæ* emendandæ remedio, quamvis argumentis nuper memoratis á *Te Vir S. V.* suffulto, opus esse videtur; easque ob rationes prædictam computationem, etsi dubia, quæ contra eam movisti, prævidens, sine omni hæsitatione, eo lubentius retinui, cum satius semper duxerim, veteres, quamdiu nihil absurdi vel aperte falsi tradunt, pressio pede sequi, quam aliquid in eorum relationibus vel calculis ex ingenio mutare, ne, genuinæ antiquitatis loco, mea commenta venderem. Et si vel maxime necesse esset, unum annum ad finem exilii Flosii addere, ut tres integri anni emergerent, nihilo tamen secius epocha legis de duellis abrogandis, incendiique Níaliani, ut & comitiorum post id proximorum, quam collocavi, prorsus immota permanet, & *Níalsfagæ* autor, utpote sine omni ambage statuens, Ericum Comitem hiemem anni 1015. in Norvegia egisse, testis æque idoneus nobis esse poterit, veterum Islandiæ historicorum quosdam, ut alibi (a) pluribus adstruxi, vere observasse, quod prædictum regnum anno 1012, plene non reliquerit.

His ita peroratis, ad *mutationem*, s. verius *confusionem nominum*, quam *Gunnlaugsfagæ* auctori (b) objicis, pervenimus. Hic autem, ut verum fatear, durius justo cum eo agere mihi videris, dum eum (c) *haud apposite Thorfinnum de Raudamel, ut Thorsteino Egillidæ* prorsus æqualem, & *multo ineptius* (d) *ipsum Thorgilsum Thorfinni filium, ut Gunnlaugo & Helgæ ætate parem, adducere* scribis. Neutrum enim ei unquam in mentem venit. Nam priore loco (e) tantummodo indicat

(z) Cap. 159. p. 281.

(a) ad Gunnl. Ormst. Vit. not. III p. 174.

(b) p. 364-65.

(c) p. 62.

(d) p. 74.

(e) p. 62.

dicat, Thorfinnum anno 1003. Raudameliæ habitasse, & paucis interjectis (f), eodem cum Aunundo Mossfellensi, Skaptio legifero, & Thorsteine Egilli filio, tempore adhuc vixisse; Posteriore vero (g) Thorfinni filios viros fuisse tam bene formatos, ut Gunnlaugo haud multo inferiores, vel, si virtutis, nobilitatis, & opum ratio haberetur (ætatis enim hic nulla mentio est), matrimonio cum Helga indigniores, censeretur possent.

Prius quod attinet, quotidiana tam recentiorum quam antiquiorum temporum experientia loquitur, homines simul vivere, rebusque gerendis idoneos esse posse, quorum unus alterum 20, 30, imo 40 & pluribus annis superat. Ita ego, etsi quinquagesimum ætatis annum agens, socios negotiorum in Collegio Camerali Regio quotidie habeo viros, quorum unus 30 circiter, alii viginti & pluribus annis me majores sunt. Ita etiam *Tecum V. S. V.* dimidium fere seculi jam vixi, intereaque 24 annos muneribus publicis vacavi; Tu tamen me plus viginti annis superas, & utinam quam diutissime, in Ecclesiæ rei que literariæ emolumentum super sis. Verè ergo dici possumus eodem tempore, vel simul vixisse, quamvis Tu jam tum, antequam natus eram, rebus gerendis maturus esses. Eadem ratione, eodemque sensu, (nequaquam vero ut perfectam ætatis æqualitatem indicaret), autor noster memorat, quod Thorfinnus de Raudameliæ eodem cum Thorsteine Egilli filio tempore vixerit. Idque eum verè affirmare, eosque una floruisse, præter multos alios seculi X^{mi} synchronismos, quos singulatim recensere tædiosum, firmo satis argumento sunt eorum uxores, & Thorfinni quidem, quippe quæ Oddi Tungensis, Thorsteinis vero, quæ Gunnaris Hlifæ filii filia erat. Iam Oddum simul cum Thorfinno floruisse, utriusque genus & acta, & simul cum Gunnare & Thorsteine, lites à me descriptæ (b), quas cum his habuit, liquido monstrant. Unde Thorfinnum etiam maximam vitæ partem cum Thorsteine communem habuisse facile apparet. Cum vero Thorfinni ex filio Thorgilse nepos, Thorsteinn de Hafurs,

*Arictoris
ætas*

C 2

fiar-

(f) p. 64.

(g) p. 74.

(b) ad Gunnl. vitam Not. 17. p. 21. & Not. 53. p. 75-77.

fiardarey, jamtum 1008. magnæ esset auctoritatis & potentiae, nepotes vero ex filia, fratres Thorbrandini de Karstadis, circa annum 980. rebus gerendis maturi essent, libenter quidem concedo, Thorfinnum, (cui vitam bene longam contigisse omnia svadent), annis non ita paucis Thorsteine Egilli filio majorem fuisse. Verum cum aliunde (i) constet, filium Thorsteinis Skulium, jamtum anno 1000. virum fuisse perfectæ ætatis, ad prædictam ætatis Thorfinni & Thorsteinis differentiam supplendam, ne 20 quidem annos requiri manifestum est.

Posterius, nempe inæqualitas ætatis filiorum Thorfinni, & Helgæ Thorsteinis filiae, tanti nequaquam est, quanti primo obtutu videtur. Ut enim verum est, Thorgillis Thorfinni filii filium sororem Gunnlaugi Ormstungæ in matrimonio babuisse, Helgamque Gunnlaugo, anno 988. nato, fere æqualem fuisse (k); ita non video, quid inepti, absurdi vel inauditi-emersisset, si vel maxime unus vel alter fratrum Thorgillis juniorum, quippe quos ætate haud parum inter se inæquales fuisse, res ipsa loquitur (nam præter sorores, septem numero erant), ipsam Helgam uxorem ambiisset. Nunquam enim defuerunt, uti nec unquam deerunt, exempla virorum, qui uxores, 20 vel 30 annis (qualis ætatis inæqualitas hic plus satis sufficit) se juniores duxerunt & ducent. Sed hoc, quicquid est, controversiæ eo lubentius seponere possumus, cum *Gunnlaugsfagæ* autor, ut ab initio monui, nec Helgam Thorfinni filiis ætate parem, nec de matrimonio ab ullo eorum cum ea ineundo actum fuisse asseruerit.

Quod Sigurdum Comitem Cap. 8. pro Rognvalldo substituerit, certo affirmare haudquaquam possumus, cum plurimum absit, antiquam Gothiæ historiam ita exactam & omnibus numeris absolutam ad nos pervenisse, ut nunc plene constet, nullum alium Comitem, præter Rognvalldum, Gunnlaugi tempore in Gothia floruisse. Confidenter vero negare possumus, quod Cap. 10. Canutum Magnum Daniæ Regem loco Sveinis substituerit, cum eos conceptis, ut ajunt, verbis distingvat (l), in eo tantum, ut ipse (m) observari re-
pre-

(i) confr. Not. ad Gunnlaugi Vit. p. 12.

(k) Gunnlaugi Vit. p. 52.

(l) P. 120 - 23.

(m) Not. ad Gunnlaugi Vitam p. 121.

prehensione dignus, quod, communi omnibus veteris Islandiæ historicis, etiam optimis, de Sveinis Regis obitu errore seductus, res quasdam, sub Sveine gestas, ad Canuti tempora referat.

Eis quæ ad *chronologiam Olavianam*, s. computationem annorum regiminis Olai Sancti Norvegiæ Regis illustrandam, sub finem eruditissimæ *Tuæ* Commentationis (n) attulisti, non est quod immerer; præter illa duo, quæ in *notis* ad *Gunnlaugi Vitam* (o) tetigi, veritatem nempe hujus chronologiæ, & genuinum carminis Sighvatiani de ea sensum; ad quæ tamen paucis notasse sat esto.

1. Ut ipsis etiam *Olai Vitæ* verbis, à Te Vir S. V. alibi (p) allatis, inductus, non possum non in ea opinione adhuc persistere, quod chronologia, quam ejus autor huic suo operi substravit, mere *artificialis*, sive computandi arte confecta sit; ita certissime persuasus sum, *terminum* ejus, ut ajunt, *ad quem*, sive illum ejus articulum, quod Olaus nullo alio anno, quam 1020., vita excesserit, qui omnibus rite perpensis, principalis in ea est, quatenus magna chronologiæ veteris tam Norvegiæ quam Islandicæ pars ex eo pendet, omnino verum esse. Solus ergo, de quo *Tibi* mecum disputatio intercedit, est *terminus à quo*, s. annus, à quo quindecim illos annos, quos Olai regnasse in confesso est, rectissime ordiamur. Hoc autem intuitu.

2. Dum quæris: *quid, si Olaus anno 1015. in Norvegiam venit, & anno 1016. regnum demum adeptus est, hoc vero 1029. amisit, faciendum sit Sighvato, qui eum quindecim plenas hiemes, antequam cecidit, ibi regnasse canit?* sine omni errandi metu respondeo: Computationem, quæ Olai anno 1029. regnum amisisse supponit, nihil contra *Sighvatum* valere, cum certissimi esse possimus, quod is, utpote intimus Olai amicus, eiqve etiam mortuo, adeo deditus, ut in aula Sveinis Regis, etsi ab eo invitatus, vivere dedignaretur (q), Canutum pro injusto tantum, ut & ipsa erat, regni Norvegici usurpatore, Olai vero, quoad vixit, pro vero Rege habuerit, atqve ideo imperii ejus annos

C 3

(quod

(n) H. E. T. IV. p. 365—68.

(o) P. 175. Not. iii.

(p) Hist. Eccl. T. I. p. 75.

(q) Conf. *Sturlaun* ed. Sv. T. II. p. 11—12.

(quod ipsa etiam carminis ejus verba sic satis innuunt) ad eum usque diem anni 1030., quo Stiklastadis cecidit, numeraverit. Eaue numerandi ratione omni jure uti potuit, persuasus quippe, Olauum non tantum animum, sed spem etiam & conatum Norvegiæ recuperandæ ad extremum usque vitæ retinuisse; & spem quidem, cum Hakone Comite, cui hujus regni curam Canutus commiserat, aquis submerso, principe orbem esset, ipseque optimatum Norvegicorum quosdam, maximi etiam nominis, secum semper habuisset, pluresque Norvegorum, qui in tumultu contra eum excitato quiete se continuerant eventum expectaturi, suis partibus, si regnum repeteret, accessuros, & qui defecerant, ad obsequium redituros, auguratus esset (r); conatum vero, cum in hoc ipso Stiklastadis occubuisset. Hoc autem prælio si Olauus victor evasisset, regnumque recuperasset, annum, quo profugus fuerat, eumque ne integrum quidem, ex numero annorum regiminis ejus nequaquam demi potuisse, *Sighvatus* facile vidit. Unde etiam ideo hunc ipsum annum, quamvis Olauus prælio caderet, ex hoc numero demi non debere, recte omnino judicavit, cum Olauus tunc primum regnum cum vita penitus amitteret. Accedit (ut imperii Canutidarum in Norvegia odium, contra vero insignem Olai Regis, brevi post mortem tempore in Divorum numerum recepti venerationem omittam) quod Canutus nec in plenam unquam Norvegiæ possessionem venerat, cum Olauus, toto etiam illo tempore, quo in quibusdam hujus regni partibus homagia ab incolis accepit, in parte orientali permaneret, manu satis valida stipatus. Nec Sveinis Canuti filii in Norvegiam imperium initium vere sumpserat priusquam ab eo temporis articulo, quo prælium Stiklastadense in Olai internecionem depugnatum est, quippe quo ipso Sveinn, ut regnum patris jussu capefferet, in Vikam primum apulit (s). Unde nihil magis naturale, quam imperii Olaviani annos ad eum usque terminum numerare, à quo successoris anni numerari cœperunt. Non ergo in annis regiminis Olai computandis mentitus est *Sighvatus*, sed eos multo magis ex sui temporis usu sensuque, ita, ut ajunt, de simplici & plano, computasse censendus est, ut ad eum recte intelligendum ne minimo quidem interpretandi artificio opus sit. Quod vero

(r) Confr. *Saur.* T. I. p. 743—44. it. 746—47.

(s) vid. *Saur.* l. c. p. 812.

vero posteriorum temporum historici, ex quibus ipse *Arius*, dimidio, reliqui integro plus seculo *Sighvato* recentiores sunt, suos calculos aliter instituerint, in censum venire haudquaquam potest; ubi tantum quaeritur: quid *Sighvatus* senserit? vel ex modo computandi & loquendi suo ævo familiari sentire debuerit? in quo is, utpotè ipsis factis coævus, præ recentioribus, quantacunque cetera auctoritatis sint, fidem mereri videtur. His inductus rationibus, prædictum *Sighvati* calculum eum esse credidi, & adhuc credo, qui ejus tempore apud Norvegos invaluit, eumque ideo calculis autorum *Vitæ Olai* prætuli, & adhuc præfero. Præterea gravem contra hos suspicionem movet, quod ne verbo quidem memorent, *Olo*, etsi eum jam tum anno 1014. in Norvegiam venisse statuunt, rem cum *Erico* Comite fuisse, cum tamen historiae *Dano-Anglicæ* de *Erico* synchronismus, & testimonia, quibus hic nititur, à me alibi (t) indicata svadeant, quod hunc annum adhuc in Norvegia egerit. Ut autem erat ad res gerendas promptissimus, belloque exercitissimus, & Norvegis haud parum honoratus, nec per integrum ferè annum otiosus spectavisset, *Olaum* majores indies vires sumere, nec à *Canuto* ad expeditionis *Britannicæ* societatem evocatus, facile paruisset, si hostem tam metuendum intra Regni sibi ex parte commissi limites tunc habuisset. Cum vero in confesso sit, quod æstate anni 1015. huic expeditioni interfuerit, inde elucescere videtur, *Olaum* eo tempore, quo *Ericus*, hanc suscepturus, Norvegiam reliquit, (quod demum post *Sveinis* Regis mortem, quæ anno 1014. contigit, factum esse; omnia indicant) eo nondum venisse.

Hæc fuere *Vir S. V.* quæ, eruditissima tua *Commentatione* monitus, præ ceteris paulo ulterius explicare necessarium duxi, ut plene constaret, quæ ratione chronologiam *Vitæ Gunnlaugianæ*, & inprimis epocham legis de duellis judiciariis apud Islandos abrogandis constituerim; quæ omnia & singula limatissimo *Tuo* judicio lubens submitto, verbisque claudio *Pœtæ*, quæ humanissimo *Tuo*, ad litteras, quibus meum de hac ipsa scriptione consilium *Tibi* primum aperui, responso subjunxisti.

*Non eadem sentire alios de rebus eisdem
Incoluni licuit semper amicitia.*

Scripsi Havniæ
15 Kal. Aug. 1778.

Emen-

(t) Ad *Gunnl. Vir.* p. 121 & 174.

*

*

*

Emendanda in Gunnlaugi Vita.

Præfat. pag. XXVII. not. * lin. 13. loco verborum: *exemplum forte secutus Eyvindi Skaldaspilleris*: legendum: quam etiam describendi rationem, ab antiquissimis inde temporibus per manus traditam, secutus est *Haukus Valdísæ filius*, qui Islandos &c. Is enim de Islandis panegyricus, vulgo *Islandinga-Drápa* ex cujus Stropha 2^{da} quæ ita incipit:

*Hvals mun ek brassa talia
Hudlendinga budar*

Islandorum appellatio, quæ l. c. memoratur, desumpta est, non *Eyvindo*, sed *Hauko* tribuitur in Codice Membraneo Bibliothecæ Magnæanæ No. 748. in 4^{to}, qui primam hujus panegyrici partem 26. integris strophis, & initio vigesimæ septimæ, constantem, & 26. præcipuorum veteris Islandiæ optimatum & Athletarum elogium continentem, ab interitu servavit.

Pag. 275. lin. 1. 2. pro: *Oddus Erics leg. Ericus Oddi.*

DOMINI
GUNNARI PAULI F.
CURÆ POSTERIORES
IN
GUNNLAUGI VITAM

ad Seviros antiquitatibus septentrionalibus evulgandis
constitutos transmissæ.

Ad Præfat. pag. IX. ad verba: *forte quis versiculos-chartis*: add. Nec defunt hodieque apud nos exempla, à viris fide dignis narrata; mihiqve per ætatem aliquoties idem accidisse vere confirmare possum. Evigilans quidem ejusmodi carmina memoria tenui, sed & redormiens eadem illa facilitate amisi. Unum hujusmodi per matutinam levemqve quietem visus & lusus exemplum hic narrare fas fuerit. Cum Vidvikæ Hialldalensium ante annos circiter 30 hospes pernoctarem, solusqve in cellula intra ædes, curarum expertus dormire, visa mihi felis murem per ædiculam, & præsertim ejus abacos, persequi; quod vere quidem dormiens vidi, sed ita leviter dormiens, ut etiam dormire me sentirem; de quo non injucundo spectaculo mihi simul natus est verborum quidam lusus, & maxima-quidem hujus pars per somnium, sed adaperitis simul oculis addita, quæ deerat, clausula. *Sonat autem carmen ita:*

Pag. 54. *barit* gull. aurum *malleatum*. Sed quid si forte *barit* gull. aurum limatum, scobs auri, a *bar* grana minuta, ut *Drunis-*
bar,

D

*mig fyrir vinni
miso & lött
mikilliga ad
svayma,
Gvönig var þá braggi brött,
báðar litu út þá gött.*

bar, *Fisubar* &c. Sæpe etiam dicitur: þó þat være *malit* gull, i. e. *quamvis aurum esset comminutum*. Sed nihil definitio; potest tamen etiam *malit* gull i. e. *aurum comminutum* respectum habere ad: *Fróða miöl*, s. farinam Fróthonis, quam appellationem præfatio carminis antiqui *Grottofaungur* auro apud poetas hæsisse docet, ex quo Frotho Daniæ Rex ancillas aurum sibi molere iusserat. Cum his porro conferri potest *Ismöl* i. e. glacies comminuta (qvibusdam *Ismiöll*), ita dicta, qvod ejus particulæ solido corpore lucidiores, & oculos magis ferire visæ sunt.

Pag. 66. Ad Stropham: Mörk baud ek &c.

In hujus Strophæ vero sensu pervidendo, oculos ante aliquot annos mihi caligasse puto; nisi jam forte magis caligant; &, qvod adhuc minus vellem, me aliis, acutius alioqvin cernentibus, glaucoma qvoddam objecisse, qvominus ad veram poëtæ mentem eorum penetraret acumen. Mutanda autem hunc in modum nunc videtur sententia: Ek baud mundánga mörk tanna-sterkum manní (at) tyggiazt; góna skalltu (i. e. fiádu) þat (Silfr) spyír nyá gráfena gló. allrádz muntu ydrazt, ef lætr (hana burt frá þer) líða, flóða or orum eydanda Siódi, (vorum nefnelega) linnz kindar samлага (felaga sc. Gunnlaugs Ormstungu) ut sensus sit: *obtuli marcam ad facoma appensam viro fortidenti mandendam. (Videbis), hoc (argentum) vomit novum griseum splendorem. Serio te penitebit, si (tibi) elabi finas effluentem ex nostro expensam faciente thesauro, (nostro inquam sive mei) serpentini generis focii. Tannasterkr dentes fortis, apposite dici potest, ut efna-vel peninga-sterkr i. e. dives opum vel facultatum, hára-döckr crines fuscus, hiua-margr numerosam familiam habens, innvida-veikr interiora infirmus, & similia. Potest tamen etiam tò tanna sumi pro infinitivo verbi: at tanna i. e. mandere, & cum tò tyggiazt, qvod tum esset superlativus adverbialis, conjungi, qvo sequens ordo sensusqve emergeret: en baud sterkum manni mundánga mörk.*

vel: gvad
killtil góna!
þu, þú þu, at
nyrna þ þau,
þau me ökurst

mörk. (at) tanna tygiazt. *obtuli marcam &c. forti viro quam mandentissime mandendam.* (at tanna *fm allra huggligast*)

In posteriori Strophæ parte *Orum* pro *ydrum* substitui, satis forte audacter, sed digne tanto Poëta, & ejus ingenio convenienter confr. pag. 44 & 92, qvi se haud dubie hic ut alias, ex. gr. p. 70. 74. 82. 110 & 114. jactans, hero bene consulit, ne cum potentiore litiget, perinde ac de mercede lupus gruem monet in fabula. Hoc autem sensu *flóda* cum *tau maurk* cohæret, estqve accusat. f. gen. participii, à nominativo *flód* v. *flóin*, verbi: *ek flói* effluo ebullio. *Eydanda* vero est ablativus mascul. gen. participii *eydandi* (confr. Ind. *Gunnlaugs-Sagæ* in voce *Eyde*), qvòd tam per participium in NS (consumens) quam per particip. in Dus (consumendus) reddi potest; in qvibus etiam mira linguarum convenientia. *Samlagar* (confr. Ind. l. v.) malim *Samlaga*, nisi qvis genitivum malit anomalum, vel etiam forte *linnsamligrar kindar* serpentis instar animati filii seu hominis; ita *linnsamligr* eodem modo formaretur ac *undrsamligr* miraculo similis, *giptusamligr* fortunam vultu præferens, & plura ejusdem farinae.

Si lectio *ydrum* in posteriore hac parte retineatur, sensus etiam hoc modo sibi constare poterit: allradz muntu ydrazt ef lætr (mör-kena) linns Samlaga kindar (eign) flóda (þer til handa) lída or ydrum eydanda (eydanligum) Siódi i. e. *toto animo te penitebit, si permittis (marcam) serpentini generis socii, (tibi) affluentem, elabi ex vestro thesauro, quippe per hoc facile consumendo; nisi forte magis arrideat!* *eydanda* linns samlaga kindar conjungere, atqve ita interpretari: *marcam expensam facientis serpentini generis socii* f. Gunlaugi Ormstungæ tibi affluentem; tum vero *eydanda* erit genit. sing. *tau samlaga* respondens.

*l. p expensas,
expensis obnoxio.*

Pag. 126. & in Ind. v. *Se. Siámæst æqvipollet τω ek sext um*, idem qvōd *litaz um*, circumspicio. contra *ek sext fyrir* prospicio, vel, qvæ ante faciem sunt, spectro. *Öu þ' m', aðgæti þu þ' mig. mæti þu þ' mig.*

Pag. 128. *Hádvarr* à ludibriis alienus vel sibi cavens, optime quidem, ut communissime τὸ *varr* in compositis: *grandvar*, a malo cavens, vel attentus, *nótvar* rete cavens, à phocis ductum, & *bo-gavar* decipulam cavens, à vulpeculis ductum, annosa enim vulpes non facile capitur laqueo. Sed quid si forte *bávarr*, qvōd sua cogitata fidenter, & elata altius voce, minusque decenter aut modestè proferentem notat? Sic certe *bávarr* vulgo dicitur homo immodestus, atqve indecentius garrulus, justoque vocalior, forte à *Varar* sermones amatorum, qvos clanculum aut certe submisso haberi conveniens visum, contrarium vero ab ejusmodi negotio magis alienum. Hic autem *Rasn* à *Gunnlaugo*, utpote hoste, & cetera poëta haud parum mordace *bávarr* quasi procax, petulans, præfidens, dici potuit.

Ibid. *Hridmundadar* vel *bridmundadr*. Facile hic acquiescendum iis qvæ habet pag. 129. unacum *Indice*, in hac voce, nec plura aut nova adferre libet lectiones sollicitando. Id tantum forte non abs re fuerit, τὸ *mundadr* conferre cum *Níúls-Sagæ* pag. 78. at *munda atgeirnum* i. e. cunctanter & magna cum circumspectione, libripensis instar, vibrare, quasi *mundángsbóf* i. e. medium seu metam qværendo. Vulgo dicitur: *at mynda sig vid þad edr þad* i. e. tarde & cunctanter accingere se vel aggredi, unde ductum ludibriolum, nec tamen recens, puer audiui. Verbum autem *at munda* non multum abludit à Græco, *μαρθάνω* & *μαθῆναι*; discimus enim dum rem cogitando versamus & ponderamus, donec ad verum pervenimus. Ad voces *mundadr* & *munda* porro pertinent *mundangr* examen libræ (vid. Ind. *Gunnlaugs-Sagæ* in h. v.), nec non *midmunda* trium primarum

rum post meridiem horarum medium, & *namunda* proximitas, quæ omnia, ut & *medalbóf*, medium sive rectum, ad modum & rationem librandi spectant, uti alio sensu, sed eodem intuitu, duo *bóf* s. media vel puncta, metæ s. recto propinqua, vulgi sermone satis trita sunt, quorum neutrum stultum unquam assequi ajunt, utpote in extremis, excessu scilicet vel defectu, semper versantem. Huc & referri potest *konu mundr* dos appensa, ex quo forte latinorum *mundus muliebris*; sua enim ornamenta iis data. Ita etiam idem anni vel diei punctum iterum recurrens, *i sama mund*, appellatur, unde porro latius adhuc & generatim: *i þat mund*, et *i þær munder*, eodem sensu dicitur ac: *eo tempore*. Cetera mihi à probabilitate recedere non videtur veteres *mundang* dixisse quasi *mund-báng* i. e. *manu appensum*, à more manu, imprimis utraqve simul, pondera rerum explorandi, quo piscatores aliosque dextre adeo & accurate uti haud raro vidi, ut pondus ad examen revocatum parum vel nihil à vero aberrasse repertum sit; quæ ponderandi ratio, ut ab ultima inde antiquitate longe ante libras & alias ponderandi machinas inventas usu venit, ita vox eam significans ad has traducta esse videtur. *Pendo*, *pendeo*, *pondus*, *pondo* ejusdem organi literas cum *tau mund* habent; & *manus* à *manando* Latinis ducitur; imo ni fallor nihil aliud est quam ipsum *mund*, quemadmodum Græcum *χερ* non omnino dissimile est septentrionali *Hveisi*. *Mundus* etiam suum nomen hinc habere facile potest, quasi pendulum quid; veteribus enim globi nostri constitutio ignota non fuit.

forte et *mund* -
láng, ut *sandláng*
palm, mensura

Ibid. Posterioris ejusdem Strophæ partis ordo & sensus: p. 129. *lusimus enim variis mutuo missis reculis aureis circa illam serp. er. terram* &c. non admodum coactè procedunt, nisi quod *ymfar landsiur* proprie mutuum lusum spectari syadent, quarum etiam communis usus hic spectari potest, quamvis solius Gunnlaugi actio vel lusus narretur. Quando dicitur: *eg leik mer ad þvi edr þvi* i. e. *hac*

D 3

vel

q extrinseca litera f, quemadm. V in vocabulis *Kapangr* et *þangr*, voce *vangr* locum significante.

vel illa re ludo spectatur objectum lusus, non mutuo agens. Sed: ver lekum ofi i.e. lufimus, mutuum est vel commune, libero alioquin manente numeri singularis pro plurali usu. Peculiaris præterea est usus verbi *ek leik* in lusu aleæ, latrunculorum &c. de promotione orbiculi vel militis, ut sensus esse possit: *ver lekum andsum at þvi landi*: promovimus nunc istum nunc alium orbiculum vel militem adversus eam puellam, vel versus illud alvei latus, cui illa assedit.

Pag. ¹²⁰163. & Ind. v. *yðogg*. Hugdunzt Orms at armi Y-döggvar þer höggvinn &c. Orms-yr, arcus serpentinus cum sagitta potest esse lingua serpentis, ut sensus sit: *cum in tuo amplexu dormirem, videbar mihi à Gunnlaugo Vermilingue vel serpente vulnerari*, quam explicationem responsum Helgæ hoc loco satis confirmat. Orms-yr lingua serpentina jaculatrix, quemadmodum Græcè ὄφις jam sagittam, jam venenum signat. In posteriori hujus Strophæ parte quorundam MSSorum (si recte memini) varians lectio: *va* pro *þat* etiam quæ sensum convenit. Hic etiam *bagþyrnis undir* conjungi possunt, & per vulnera serpentina explicari, perinde ac *Virgilius vulnus Ulyssi* dixit, ab Ulyssæ inflictum; ita integra appellatio foeminæ hoc loco erit *lauka lind*, vid. Indic. ad Gunnlaugi Vitam v. *laukr*.

Item *sagþyrnis*
a, malit impro-
visu à serpente
latu: nec non
sagþyrnis lauka
lind, mulier com-
moda (ab *sagr* et
þor) l. *sagþyrnis*
nio (indidem)
Et adhuc: *liþ*
wa gatr *lauka*
lind, similis
casus eam ma-
net l. appre-
hendet. vel *liþa wa gatr*, simile nanciscetur malæ foeminæ

Pag. 138. var. lect. t *hafdizt ecki* at otiosus residebat. Huc spectant: *Atböfn* actio; *athæfi* vivendi ratio. *Eg þefi at mer fari* (verbum nauticum) funem piscatorium ad me attraho. *Eg þefi ad mer cibum* ori ingero (avidius fere) confr. Jobi XV, 16. & XXXIV, 7. *Ad athafna sig* (verbum vulgare) ad opus aliquod se accingere: ut et. *at hafaz at*, *hafa* ad ser, ut *bidiaz*, *mæ laz fyrir* &c. quod per synecdochen latius extenditur. Usurpatur etiam *ad athafna* & *atböfn* quibusdam (speciatim orientalibus) sensu venereo; & novi juvenis senem borealem, qui *athæfi* de membro virili usurpavit, insolito suis modo, sed tamen haud dubie per atatem omnis orientalis commercii experts.

Pag.

Pag. 160. loco: *svanmærrar* nunc arridet var. lectio e, *mektar*, ut inde fiat *svan-mekkrar*, a *makki*, qvōd cervicem eqvinam notat s. ejus summitatem, non infimum hujus animalis ornamentum Job. XXXIX. 22. *stockmekkr* hestur dicitur cui pingvedine turget cervix suprema. Laudatur ergo hic collum mulieris, olorini instar candidum atqve erectum.

Pag. 184. & in Ind. v. *bræskierr*. De pisciculis dicitur *ein-tvi-pri-skierr* (1 bak) passive, pro frustulorum numero in qvæ à tergo discindi possunt. Sed multa adjectiva utroque modo dicuntur, ut: *fer*, *bær*, *bætt*, *tækr* &c. cum compositis. *Hráfskierr*, crudivorus, gratus sonaret, sed & *bræskierr*, qvōd optimi Codices habent, reprehensione carere potest.

Pag. 186-87. Ordo posterioris hujus carminis partis satis quidem bene se habet; sed nec forte minus bene hoc modo: „*sárfskinn gammr hlaut enn þramma á fárra sár*“ i. e. *vulnerum appetenti vulturi contigit adhuc vulneratorum (cæsorū) vulnera calcare.*

Pag. 192. Placet jam rhythmus ejusque sensus hoc modo: „*ek hugða mer armgóða lins tróðu minna at Orms armi*“ i. e. *putavi mulierem, mihi minus faventem, recordatam brachii serpentis* i. e. *Gunnlaugi. Armgóð* alias pulchre brachiata, vel brachio fovens atqve amplectens, ab *armr* brachium; sed hic esset, brachii invidens, parum favens aut commoda (eum enim multum non amavit p. 191.) ab *armr* miser, infelix, ut Germ. *Armselig*. Huc & spectat lectio a, *leidrar* (minus recte scribitur *leydrar*) tædio adfectæ & pariter tædium creantis: *Eg verd leidr á því tædet me. Liufr verdr leidr* i. e. fit dilectus tædiosus s. ingratus. *Tædium* lat. ejusdem originis, & *tædet* *leidiz*.

Torsitan et sic: Eð sugða mér armgóða tróðu (absol. falskinn) minna at orms armi (þess) andaða n^o andvana orms. Quid brá (dvo) þýndilga) snúar lífi, Quid þýrkiinnar víon n^o þkodan.

Vel etiam: Eð sugða mér armgóða tróðu minna at orms armi. Linn (orms, Gunnlaugs) qisð (þýrki) brá lífi snúar lífi.

Talem sensum cum assonantia metrica felicem poetam (pag. preced.) quam optime decere existimo; nisi forte qd ma qid brá linnar lífi, sc. pulchritudinis respectu amabilis: et linn andvana, vel mortui serpentis (recordant) vel eo destituta egr m.

Tanta hic se offert varietatis copia atqve incertitudo: et ad linnar facti ex linnar, laudatæ, l. Blinnar, hūmata, p.

